



**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKO VIJEĆE**

Broj:01-
Datum:

PRIJEDLOG

Na osnovu člana 1. Zakona o dopunama zakona o koncesijama ("Službene novine FBiH", broj: 61/06), člana 8. Zakona o principima lokalne samouprave ("Službene novine FBiH", broj: 49/06) i člana 14. Statuta Općine Tešanj («Službeni glasnik Općine Tešanj», broj: 11/07), Općinsko vijeće Tešanj na svojoj _____ sjednici, održanoj _____ 2018. godine, donosi

ODLUKU

o davanju saglasnosti za dodjelu koncesije

Član 1.

Daje se saglasnost na mogućnost dodjele koncesije na istraživanje i eksploataciju mineralnog resursa - krečnjaka na lokalitetu Trebačko brdo, općina Tešanj, na parceli označenoj kao k.p. broj: 703/1 K.O. Trepče, zvana TREBAČKO BRDO, po načinu korištenja Šuma 2. klase u površini od 329.811 m² i Šuma 6. klase u površini od 206.152 m² kojoj odgovaraju parcele starog premjera k.p.broj: 617/3 upisana u ZK uložak br. 36, k.p.broj: 639/1 upisana u ZK uložak br. 539, k.p.broj: 538/1 upisana u ZK uložak br. 23, k.p.broj: 639/2 upisana u ZK uložak br. 512 i k.p.broj: 631 upisana u ZK uložak br. 480 sve upisane u K.O. SP Trepče.

Član 2.

Prostor predviđen za eksploataciju, površine 3,3ha definisan je koordinatama prelomnih tačaka obrađenih Studijom o ekonomskoj opravdanosti dodjele koncesije na istraživanju i eksploataciji mineralnog resursa-krečnjaka na lokalitetu „Trebačko brdo“, Trepče, u općini Tešanj.

Lokalitet predviđen za eksploataciju je dio:

- Zemljišta označenog kao k.p. br. 703/1 zvana TREBAČKO BRDO upisana u K.O. Trepče.

Član 3.

Odlukom o provođenju izmjena i dopuna prostornog plana Općine Tešanj („Službeni glasnik Općine Tešanj“, broj: 7a/09) utvrđen je način korištenja prostora za eksploataciju mineralnih i nemineralnih sirovina. U grafičkom prikazu površina posebne namjene, prostor predviđen za eksploataciju i dodjelu koncesije, rezervisan je za eksploataciju mineralnih sirovina i predviđen kao kamenolom.

Član 4.

Član 64. Odluke o provođenju izmjena i dopuna prostornog plana Općine Tešanj na grafičkom prilogu br. 18 kao i tabelarna u tekstualnom dijelu plana, evidentirao je objekte kulturno historijskog nasljeđa. U skladu s tim na lokalitetu planiranom za dodjelu koncesije nema evidentiranih objekata kulturno-historijskog nasljeđa.

Član 5.

Na osnovu podataka iz člana 106. Odluke o provođenju izmjena i dopuna prostornog plana Općine Tešanj, te podataka kojima raspolaže nadležna općinska služba, poznata su izvorišta koja se zaštićuju i koja služe stanovništvu za snadbijevanje vodom, ili koja mogu da predstavljaju rezerve za buduće vodopsnadbijevanje.

U skladu s tim na lokalitetu planiranom za dodjelu koncesije nisu evidentirane zone sanitarne zaštite izvorišta voda koje se koriste ili se planiraju koristiti za snadbijevanje stanovništva pitkom vodom, niti na predmetnom lokalitetu ima rezervoara, cjevovoda i drugih vodnih objekata.

Član 6.

U toku provođenja procedure dodjele koncesije, koncesionar ima obavezu pribavljanja svih relevantnih dozvola u skladu sa zakonskim propisima koji regulišu ovu oblast.

Član 7.

U cilju zaštite lokalne ceste **LC-15 Medakovo-Trepče-Rakovice-Šije** od prekomjernog opterećenja učestalim saobraćanjem vozila sa eksploatacionim materijalom, obavezno je preusmjerenje istog na nerazvrstanu cestu zv. DRUM (put koji spaja Trebačko brdo sa putem Medakovo-Šije).

Koncesionar je dužan obezbijediti adekvatnu zaštitu okolnog zemljišta od urušavanja ili eventualne pojave klizišta, pristup privatnim parcelama i lokacijama na kojima se nalaze radio i drugi predajnici, te sanaciju površinskog kopa nakon završetka eksploatacije.

Član 8.

Ova odluka stupa na snagu narednog dana od dana objave u "Službenom glasniku Općine Tešanj".

PREDSJEDAVAJUĆI VIJEĆA

Subašić Senad, dipl.ecc.

O b r a z l o ž e n j e

PRAVNI OSNOV

Mogućnost dodjele koncesije na istraživanje i eksploataciju krečnjaka na lokalitetu „Trebačko brdo“, Trepče, općina Tešanj, sadržan je u članu 1. Zakona o koncesijama ("Službene novine FBiH", broj: 40/02, 61/06) i člana 8. Zakona o principima lokalne samouprave ("Službene novine FBiH", broj: 49/06).

RAZLOZI ZA DONOŠENJE

U realizaciji procedure dodjele koncesije, Kantonalno ministarstvo za privredu, u skladu s odredbama Zakona o koncesijama i Zakona o principima lokalne samouprave, na osnovu kojih Općinsko vijeće Tešanj ima nadležnost da vrši politiku upravljanja prirodnim resursima i raspodjelom sredstava ostvarenih na osnovu njihovog korišćenja na teritoriju koji je definisan općinskim granicama, zatražilo je svojim aktom broj: 04-18-6910-2/18 od 11.10.2018. godine saglasnost za dodjelu koncesije na istraživanje i eksploataciju mineralnog resursa krečnjaka na lokalitetu „Trebačko brdo“, Trepče, općina Tešanj, u površini od 3,3 ha, na parceli označenoj kao k.p. broj: 703/1 zvana TREBAČKO BRDO, upisana u PL broj 63 K.O. Trepče kao posjed JP ŠUMARSTVO.

Uz zahtjev za davanje saglasnosti na dodjelu koncesije, dostavljena je:

- Studija o ekonomskoj opravdanosti dodjele koncesije na istraživanje i eksploatacije krečnjaka na lokalitetu Trebačko brdo, općina Tešanj urađenoj od strane "GEO-INTERMAX" d.o.o. Tuzla.

Svojim aktom Ministarstvo za privredu posebno je insistiralo na tome da saglasnost treba da odgovori na pitanja vezana za stanje i status zemljišta (istražno-eksploatacionog polja) sa stanovišta:

- zemljišnih knjiga i katastra sa vlasničkom strukturom,
- Prostornog plana Općine,
- sa aspekta zaštite historijskog i kulturnog nasljeđa,
- sa aspekta sanitarne zaštite izvorišta voda koje se koriste ili su planirane da se koriste za piće ili izgradnje vodovodnih objekata.

Studijom je utvrđeno da prostor na kome su izdvojene parcele zemljišta za istraživanje i eksploataciju krečnjaka nije naseljen u krugu od 700 m vazdušne linije. Studijom je takođe predviđeno da se eksploatacija neće vršiti miniranjem, nego otkopom. Otkopana masa je predviđena za utovar i transport do drobilice gdje će u toku procesa drobljenja primjenjivati mjere "orošavanja" čime će se uticaj prašine na okolinu svesti na minimum ili u potpunosti neutralisati. Planiranim istražnim radovima obuhvaćena je zapremina od oko 150.000 m³ materijala, od čega se procjenjuje da bez jalovine eksploataciona rezerva iznosi 121.000 m³. Planirani vijek projekta je 8 godina uz predviđenu godišnju proizvodnju od 15.000 m³. Prihodi Kantona po osnovu koncesije će se u omjeru 70:30 vraćati u općinu Tešanj, te će se po ustaljenoj praksi usmjeravati u mjesnu zajednicu na kojoj koncesija i jeste. Uz sve dileme u pogledu pozitivnih ili negativnih aspekata ove odluke, posebno je važno istaknuti namjeru i očekivanja da se višegodišnja nelegalna eksploatacija na Trebačkom brdu usmjeri u zakonske okvire.

Imajući u vidu izloženo u Studiji, Služba za finansije, privredu, komunalne i inspeksijske poslove obezbijedila je potrebne službene podatke, te na osnovu toga i Mišljenja Savjeta MZ Trepče, akt broj: 03-S-199/18 od 02.11.2018. godine datog na osnovu prethodno provedene ankete građana i zaključaka sa Skupštine MZ Trepče. Osim toga Načelnik općine je realizirao i sastanak sa Savjetom MZ Trepče. **Osim Obrazloženja uz tekst ove odluke Općinskom vijeću dostavljamo na uvid i kompletan sadržaj Studije.**

OBRADIVAČ
Služba za finansije, privredu, komunalne
i inspeksijske poslove

Hamzavija Hojkurić, dipl.ecc

PREDLAGAČ
OPĆINSKI NAČELNIK
Mr. sci. Suad Huskić,

Broj: 02-49-2-1888-4/18
Dana: 20.12.2018. godine